

मार्निंग डोगरी न्यूज बुलेटिन, समें. 09.20 Hrs

<><><><><><>

### Headlines

1. लेफ्टिनेंट गवर्नर मनोज सिन्हा होरें नौजोआनें दा आह्वान कीता ऐ जे ओह भविक्ख लेई अपनी छमता ते ज्ञान कन्नै नमियां काहडां ते खोजां करन जिंदे'नै समाज च क्रांतिकारी बदलाव आई सकन।
2. एल.जी होरें कल केंद्री युनिवर्सिटी जम्मू च आयोजित त्रीए एरोसोल विंटर स्कूल च हिस्सा लैता। उ'नें साईंसदानें ते आर्टिफिशल इंटेलीजेंस दे माहिरें गी गुजारश कीती जे ओह साफ, हरे-भरे ते सेहतमंद भविक्ख लेई किट्ठे रलियै कम्म करन।
3. मुखमंत्री उमर अब्दुल्ला होरें पुंछ जिले च विकास स्थिति दा जायजा लैता। उ'नें जारी रपें-पैहें दा बेल्ले सिर इस्तेमाल करने ते जमीनी सतह पर हालात च बेहतरी पर जोर पाया।
4. उपमुखमंत्री सुरिंद्र चौधरी होरें आखेआ ऐ जे सरकार अपने वादे पूरे करदे होई बकाया पेदी सभनें परियोजनाएं गी बेल्ले सिर सबूरा करोआ करदी ऐ।
5. जम्मू दे गांधी नगर आहले ग्रीन फील्ड च जागतें ते कुड़िएं दी 42मीं राश्ट्री जूनियर टेनीकोइट प्रतियोगिता कल्लै थमां शुरू होई।

---

### LG-Yuvatarang

उपराज्यपाल मनोज सिन्हा होरें नौजवानें अग्गे आह्वान कीता जे ओह भविक्ख लेई अपनी छमता ते ज्ञान कन्नै नमियां काहडां ते खोजां करन जिंदे नै समाज च क्रांतिकारी बदलाव आई

सकै। उनें नोजवानें गी आखेआ जे ओह् पूरी निष्ठा ते समर्पणभाव कन्ने कम्म करदे होई ना छड़ा अपने जीवन ते भविक्ख गी संवारन, सगुआं इयां करियै ओह् पूरी दुनिया दे बेहतर भविक्ख गी दिशा देई सकदे न। कल कलस्टर युनिवर्सिटी जम्मू च आयोजित युवा तरंग कार्यक्रम दे समापन समारोह गी संबोधित करदे होई उनें नोजोआनें गी आखेआ जे विकसित समाज दे सुखने गी मूर्त रूप देने लेई ओह् नमिएं कर्दे, मुल्लें ते लक्ष्यें गी तैयार करन। उनें आखेआ जे नोजोआनें दी नमी सोच ते विचारें दी मदद कन्ने इक सनैहरे भविक्ख दा निर्माण कीता जाई सकदा ऐं सांस्कृतिक ते साहित्यिक उत्सव "युवा तरंग" गी संबोधित करदे होई मनोज सिन्हा होरें अग्गे आखेआ

<><><><><><>

### LG-Aerosol

उपराज्यपाल मनोज सिन्हा होरें कल सेंटरल यनिवर्सिटी जम्मू च "एटमोसफेरिक एरोसोल, क्लाउड एंड क्लाइमेट साइंस" विशय पर आयोजित त्रीए एरोसोल विंटर स्कूल च हिस्सा लैता। एह् आयोजन बदल फट्टने ते इस चाल्ली दिएं होरनें कुदरती करोपिएं सरबन्धी चुनौतिएं दे बारै च बक्ख-बक्ख पैहलुएं पर सोच-विचार करना हा। अपने संबोधनै च उपराज्यपाल होरें आखेआ कि वैज्ञानिकें दे सामने सभनें शा बड्डी चुनौती बदल फट्टने दिएं शेंकाएं पर सटीक ते पेशगी पेशगोई करना ऐ तां जे इस चाल्ली दिएं करोपिएं कारण होई सकने आहले नुकसान कोला बचेआ जाई सकै। उनें जोर देइयै आखेआ जे सरबन्धत सभनें हितधारकें गी किट्ठे रलियै कम्म करदे होई ऐसियां तकनीकां, संयंत्र, मशीनां ते उपकरण विकसित करने लोइचदे जिंदे'नै इस चाल्ली दिएं चुनौतिएं बारै समे कोला काफी पैहले प्रशासन ते जनता गी आगाह कीता जाई

सकै। एल.जी होंरें टकोहदा करियै साइंसदानें ते आर्टिफिशल इंटेलीजेंस दे माहिरें गी बी किट्ठे रलियै कम्म करने दी सलाह दिती तां जे इक खुशहाल, हरे-भरे, साफ-सुथरे ते नरोए भविक्ख दा निर्माण होई सकै।

<><><><><><>

### CM-Poonch Visit

मुख्यमंत्री उमर अब्दुल्ला होंरें कल पुंछ जिले च जारी विकास बाद्दे दे कम्में दी व्यापक समीक्षा कीती। इस बारे सददी दी इक उच्ची सतह दी बैठक दी अध्यक्षता करदे होई मुख्यमंत्री होंरें विकास कम्में लेई लाट कीती गेदिएं रकमें गी समेंसिर खर्च करने पर जोर दिता ते आखेआ जे कम्म जमीनी सतह पर तोड़ चढ़े दे लभने चाहिदे ते एहदे लेई नियमें कायदें दी सख्ती कन्नै पालमा कीती जानी लोड़चदी। मुख्यमंत्री होंरें सरबंधित सभनं मैहकमें गी निर्देश दिता जे परियोजनाएं दे कम्मैं च तेजी आंदी जा तां जे इन्हें विकास कम्में दा लाह लोके गी तौले शा तौले हासल होई सकै। मीटिंगें च होरनें दे अलावा मंत्री सकीना इत्तू, जावेद राणा, जावेद डार ते सतीश शर्मा बी शामिल हे। मगरा उमर अब्दुल्ला होंरें पुंछ लेई 13 करोड़ 54 लक्ख रपे दी लागत आहले 5 महत्वपूर्ण विकास प्रोजेक्टें दा ई-सरिस्ते राएं उद्घाटन कीता जिंदे च मेंढर च देसी खद तैयार करने आहली इकाई ते हवेली ते सुरनकोट च केई पानी सप्लाई स्कीमां बी शामिल न।

<><><><><><>

### National Milk Day

भारत च श्वेत क्रांति दे जनक खोआने आहले डॉ. वर्घीस कुरियन हुंदे सम्मान च हर बरें मनाए जाने आहले दुधै सरबन्धी राश्ट्री ध्याड़े दे मौके पर पशुपालन विभाग जम्मू दे एक्सटेंशन ते प्रचार सीगे आसेआ इक सेमीनार दा आयोजन कीता गेआ। इस कार्यक्रमें दरान डेयरी विकास ते करसानें दी सशक्तिकरण सने ग्रामीण अर्थ बवस्था गी तगड़ा बनाने च डेयरी सहकारी समितिएं दी भूमिका पर बी लोऽ पाई गई। डेयरी विकास दे मिशन डरैक्टर नरेंद्र सिंह बाली होर इस कार्यक्रम दे मुख परौहने हे। सेमीनार दरान डेयरी पशुएं च बमारिएं दे प्रबंधन बारे इक ब्यौरेवार पेशकारी दिंदे होई इक वक्ता नै आखेआ .

<><><><><><>

## ARTO-Ramban

मोटर गइडिएं सरबन्धी विभाग आसेआ रामबन दे उखराल आहले तहसील हैडक्वार्टर च ट्रांसपोर्ट आपरेटरें, डरैवरें ते कंडक्टरें लेई शिड़क सुरक्षा जागरूकता, सिखलाई ते सलाह-मिशवरा देने आहले इक व्यापक कार्यक्रम दा आयोजन कीता। इस कार्यक्रम दा मकसद सभनें सरबन्धत धड़ें गी सुरक्षित ढंग्गै' नै गइडी चलाने, ट्रैफिक नियमें दी पालमा करने ते पहाड़ी इलाकें च शिड़क हादसे घटनाने लेई अपनाए जाने आहले हीलें बारै जानकार बनाना हा। रामबन दे ए.आर.टी.ओ कुलदीप सिंह होरें ट्रांसपोर्ट आपरेटरें गी आखेआ ऐ जे ओह इस गल्लै गी पक्का करन जे उंदे डरैवर ते कंडक्टर पूरी चाल्ली अनुशासित रौहन ते सुरक्षा नियमें गी ध्याना च रखदे होई गै गइडी चलान। आकाशवाणी समाचार कन्नै इस बारै गल्ल करदे होई रामबन दे ए.आर.टी.ओ होरें आखेआ .

<><><><><><>

उपमुख्यमंत्री सुरिंद्र चौधरी होरें आखेआ ऐ जे सरकार लोकें कन्नै कीते गेदे वायदें गी पूरा करदे होई इस गल्लै गी बी यकीनी बना करदी ऐ जे पूरे जम्मू-कश्मीर च लम्में चिरै थमां बकाया पेदिएं परियोजनाएं गी तौले तोड़ चाढ़ेआ जा। उपमुख्यमंत्री होरें एह गल्ल कल श्रीनगर दे खानयार ते हजरतबल इलाकें दे दौरे दरान आक्खी जित्थे ओह जारी विकास कम्में दी प्रगति ते रफ्तार दा मुआयना करने गितै गेदे हे। विकास प्रोजेक्टें दा मौके पर निरीक्षण करदे होई उपमुख्यमंत्री होरें आखेआ जे सरकार अपने कीते दे हर इक वायदे गी पूरा करने लेई बचने बज्झी दी ऐ।

<><><><><><>

### Modern Looms

कश्मीर दिएं दस्तकारिएं ते हत्थखड्डिएं सरबन्धी विभाग नै कैपेक्स 2025-26 दे तैहत कलीन दी बुनाई आहले अपने सिखलाई केंद्रें लेई नमीं किस्मै दिएं 25 आधुनिक फौलादी खड्डिएं दी खुश-खरीद कीती ऐ। उन्न दे विकास आहले केंद्री बोर्ड दी व्हुल प्रोसेसिंग स्कीम दे तैहत मजूदा माली बरें लेई कपड़ा मंत्रालय आसेआ लाभार्थी बुनकरें आस्तै मंजूर कीती गेदी कलीन बनाने आहली 100 बाद्दू खड्डिएं दे अलावा एह 25 फौलादी खड्डियां दित्तियां गेइयां न। प्रेस लेई जारी इक बयान च इस बारें ब्यौरे सांझे करदे होई मैहकमे दे इक प्रवक्ता नै आखेआ ऐ जे इनें नमी फौलादी खड्डिएं गी इस चाल्ली कन्नै तैयार कीता गेदा ऐ जे इन्दे कन्नै अराम कन्नै बौहने दी बवस्था, लतें लेई थाह ते पिट्ठ लेई ढासने दी बवस्था बी कीती गेदी ऐ।

<><><><><><>

## Tennikoit C'ship

जम्मू दे गांधी नगर आहले ग्रान फील्ड च जागतें ते कुड़िं दी 42मीं जूनियर राश्ट्री टेनीकोइट प्रतियोगिता शुरू होई। भारत ते जम्मू-कश्मीर दिं टेनीकोइट फेडरेशन आसेआ जम्मू-कश्मीर खेड्ठ काउंसल दे सहयोग कन्नै आयोजित कीती जा'रदी 5एं दिनें दी इस प्रतियोगिता लेई 24एं राज्यों ते केंद्र शासित प्रदेशें थमां तकरीबन साड्ठै 500 खडारी ते अधिकारी जम्मू आए दे न। इस मौके पर अपने उद्घाटनी भाषण च युवा सेवाएं ते खेड्ठें सरबन्धी विभाग दिं कमिशनर सैक्रेटरी यशा मुदगल होरें राश्ट्री स्तर दे बड्डे खेड्ठ आयोजनें लेई जम्मू-कश्मीर दी बधदी समर्थ उप्पर लोऽ पाई।

<><><><><><>